

## DOMENIE III DI AVENT

### Antifone di jentrade Fil 4,4-5

**S**tait simpri legris tal Signôr.  
Us al torni a dî: stait legris,  
il Signôr al è dongje.

**No si dîs** Glorie a Diu.

### Colete

Cjale, Diu, il to popul  
ch'al spiete cun fede la nativitât dal Signôr  
e fâs ch'al rivi a celebrâ cuntune contentece dute gnove  
il grant misteri de salvece.  
Pal nestri Signôr Gjesù Crist to Fi, ch'al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE Is 61,1-2.10-11

**O gjoldarai une vore tal Signôr.**

Dal libri dal profete Isaie  
Il spirt dal Signôr Diu al è parsore di me,  
parcè che il Signôr mi à onzût,  
mi à mandât a puartâur la buine gnove ai puars,  
a fassâ chei dal cûr crevât,  
e a contaûr ai depuartâts ch'a son libars,  
ai presonîrs ch'a puedin lâ,  
a proclamâ un an di grazie de bande dal Signôr.  
O gjoldarai une vore tal Signôr,  
e la mê anime si indalegrarà tal gno Diu,  
parcè che mi à riviêtût cui vistîts de salvece,  
e mi à taponât cu la manteline de justizie;  
come un nuviç che si met une corone  
e une nuvice che si furnîs cu lis sôs zois.  
Parcè che come la tiere e bute fûr i siei butui  
e il zardin al fâs butulâ lis sôs semencis,  
cussì il Signôr Diu al fasarà butulâ la justizie  
e la laut in face di ducj i forescj.  
Peraule di Diu.

### SALM RESPONSORIÂL Lc 1,46-50.53-54

**R.** La mê anime e gjolt intal gno Diu.

La mê anime e cjante la grandece dal Signôr  
e il gno spirt al gjolt in Diu, gno salvadôr,  
parcè che al à tignût cont de umiltât de sô sierve.  
Ve, di cumò indenant  
dutis lis gjenerazions mi disaran furtunade. **R.**

Parcè che Chel ch'al pò dut mi à fatis grandis robis,  
e sant al è il so non,  
e passe di gjenerazion in gjenerazion la sô misericordie

par chei che lu temin. **R.**

Al à jemplâts di robe i afamâts  
e al à parât indaûr a mans scjassant i siôrs.  
Al à socorût Israel, so servidôr,  
visantsi de sô misericordie. **R.**

### **SECONDE LETURE 1 Ts 5,16-24**

**Spirit, anime e cuarp, ch'a sedin tignûts cont cence maglis par cuant che al tornarà il Signôr.**

De prime letare di san Pauli apuestul ai Tessalonicês

Fradis, stait simpri legris. Preait cence soste. Ringraziat di dut. Di fat e je cheste la volontât di Diu in Gjesù Crist sul vuestri cont. No stait a distudâ il Spirt. No stait a dispreseâ lis profeziis. Esaminait dut e tignît ce ch'al è bon. Stait lontans di ogni sorte di mâl.

Il Diu de pâs us rinfuartissi fint insomp e dut ce ch'al è vuestri, spirt, anime e cuarp, ch'a sedin tignûts cont cence maglis par cuant che al tornarà il Signôr nestri Gjesù Crist. Chel che us clame al è di peraule e al puartarà dut al colm.

Peraule di Diu.

### **CJANT AL VANZELI Is 61,1**

**R.** Aleluia, aleluia.

Il spirt dal Signôr al è parsore di me,  
mi à mandât a puartâur la buine gnove ai puars.

**R.** Aleluia.

### **VANZELI Zn 1,6-8.19-28**

**Framieç di vualtris al è chel che vualtris no cognossês.**

Dal vanzeli seont Zuan

Al fo un om mandât di Diu,  
il so non al jere Zuan.

Lui al vignì come testimoni  
par fâi di testimoni a la lûs,  
par che ducj a crodessin midiant di lui.

Nol jere lui la lûs,  
ma par fâi di testimoni a la lûs.

Cheste e je la testimoniance di Zuan cuant che i gjudeos i mandarin di Gjerusalem predis e levits a domandâi: «Tu, cui sêstu?». Al professà, nol dineà, al professà: «Jo no soi il Crist». I domandarin: «Ce sêstu alore? Sêstu Elie?». Al dîs: «No lu soi». «Sêstu il profete?». Al rispuindè: «No». Alore i diserin: «Cui sêstu? In mût ch'o podìn dâur une rispueste a di chei che nus an mandâts. Ce disistu di te?». Al rispuindè: «Jo o soi vôs di un ch'al berle tal desert: Dreçait la strade dal Signôr, come ch'al à dit il profete Isaie». E a jerin stâts mandâts dai fariseos. I domandarin ancjemò: «Parcè alore batiistu se no tu sês ni il Crist ni Elie ni il profete?». Ur rispuindè Zuan: «Jo o batii cu l'aghe; framieç di vualtris al è chel che vualtris no cognossês, chel ch'al ven dopo di me e che jo no merti nancje di disgrupâi la coree dal sandul».

Chescj fats a capitarin a Betanie, di là dal Gjordan, là ch'al jere Zuan ch'al batiave.

Peraule dal Signôr.

**Si dîs** O crôt.

### **Su lis ufiertis**

Signôr, che ti vegni presentade cence polse  
la ufierte di chest sacrifici,  
par ch'e colmi il sant misteri che tu âs istituît

e cu la sô fuarce e operi in nô la tô salvece.  
Par Crist nestri Signôr.

**Antifone a la comunion cf. Is 35,4**

Disêt ai cûrs sconsortâts:  
Coragjo! No stait a vê pôre,  
ve, il nestri Diu al ven e nus salvarà.

**Daspò de comunion**

O implorìn, Signôr, la tô misericordie  
par che chescj jutoris dal cîl nus smondein de tristerie  
e nus preparin a lis fiestis ch'a stan par rivâ.  
Par Crist nestri Signôr.